

Ministru Finansa otimista Prezidente República bele promulga OJE 2023

DILI, 05 dezembru 2022 (TATOLI)—Ministru Finansa (MF), Rui Augusto Gomes, otimista Prezidente República (PR), José Ramos Horta, bele promulga proposta-lei Orsamentu Jerál Estadu (OJE) 2023 ho montante globál biliaun \$3,16.

“Karik Prezidente República veta OJE 2023, ita laiha orsamentu, signifika ita tama iha rejime doudesimál. Maibé ha’u fiar katak Prezidente República mós ema ida matenek, hadomi nasaun ida-ne’e, depois ida-ne’e mós orsamentu ikus liu ona, ne’ebé ha’u fiar katak sei iha konsiderasaun dí’ak ba orsamentu ne’e,” Ministru Rui Gomes, hateten, hafoin reuniaun semanál ho Primeiru-Ministru, iha Palásiu Governu, segunda ne’e.

Ministru mós akompaña, daudaun públiku kontinua hamosu konfuzauun liga ho montante globál OJE 2023 ne’ebé boot.

“Ha’u hanoin sempre iha konfuzauun barak iha ema-nia hanoin kona-ba OJE 2023 ne’e boot, maibé atu dehan orsamentu ne’e la boot. Ita-nia orsamentu loloos ne’e biliaun \$1,8 maibé tuir Lei Enkuadramentu Orsamentál obriga katak reseita hotu ho despeza tomak tenke hakerek iha OJE, nune’e labele iha dezorsamentasaun, tanba ne’e maka ita haree boot,” nia esplika.

Governante ne’e klarifika, Governu seidauk iha informasaun ligadu ho Prezidente República husu ba Tribunál atu halo fiskalيزasaun ba OJE 2023.

Antes ne’e, Parlamentu Nasionál aprova ona proposta-lei número 46/v(5a) OJE 2023 biliaun \$3,16 iha finál global, iha loron 17 novembru 2022 no iha loron tuir mai manda kedan ba Prezidente República.

Proposta-lei OJE 2023 ho montante billiaun \$3,16, kompostu hosi orsamentu administrasaun sentrá biliaun \$2,8 (montante ne’e inklui ona Fundu Kombatente Libertasaun Nasionál, biliaun \$1), orsamentu seguransa sosiál millaun \$235,7 no Rejiaun Administrativu Espesiál Oé-cusse Ambeno (RAEOA) millaun \$120.

Orsamentu ne’e sei uza hodi finansia programa 45 liuhosi atividade prinsipál 275, organizadu iha área estratéjiku 16 ne’ebé Governu sei foku ba iha tinan oin hanesan agrikultura, pekuária, peska no floresta, ekonomia no empregu, turizmu, dezvoltamentu rural no abitasaun, ambiente, petróleu no minerál, eletricidade no enerjia renovável, konektividade nasional, bee no saneamentu, edukasaun no for-masaun, saúde, inkluzauun no protesauun sosiál, kultura no patrimóniu, reforma Estadu, defeza no seguransa nasional, relasona internasionál no política esterna.

Jornalista : Antónia Gusmão

Editora : Julia Chatarina